

Namminersorlutik Oqartussat siunnersuummik uannga akuersinissaannut Inatsisartut aalajangiiffigisassaattut siunnersuut: Akiligassatigut isumaqatigiissutit pillugit inatsisip Kalaallit Nunaanni atuutsinneqalernissaanik peqqussut.

(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoq)

Siullermeerneranut oqaaseqaat:

Naleraq sinnerlugu aalajangiiffigisassatut siunnersuut una pillugu ima oqaaseqaateqassaanga.

Siullermik oqaatigisavara, siunnersuut Naleraq-miit taperseratsigu.

Sooq taperserparput?

Pissutigalugu ullumikkut Kalaallit Nunaanni akiligassarsilluni pisinermit tunngasut pillugit inatsit pisoqaammat. Inatsit atuuttoq tunngaviatigut 1980-kkunneersuvoq, taamaattumillu ullutsinnut inuiaqatigiinnullu naleqqussarneqarnissaa pisariaqartuuvoq, piffissanngorlunilu iliuseqarfiginissaa.

Ullumikkut innuttaasut aningaasaqarnikkut isumaqatigiissutinut assigiinngitsunut amerlanerusunut periarfissaqarput. Taamaattumik pingaaruteqarpoq inatsisit ersarinnerunissaat, ullutsinnut naleqqunnerunissaat, innuttaasullu pitsaannerusumik illersorneqarnissaat.

Siunnersuutip tamanna anguniarpaa.

Naleqqamiit pingaartumik pitsaasutut isigaarput, atuisut pitsaannerusumik illersorneqarnissaat anguniarneqarmat. Akiligassarsinermit isumaqatigiissusiortoqassatillugu innuttaasup paasilluarsimasariaqarpaa, suna isumaqatigiissutiginerlugu, qanoq akeqarnersoq aammalu kingunerisinnaasai suunersut. Tamanna tamatsinnut pingaaruteqarpoq.

Aamma pitsaasuvoq akiligassiisup paasissutissiisussaaitaanerata annertusineqarnissaa. Tassa innuttaasut isumaqatigiissummut akuersinnginnerminni paasissutissanik amerlanerusunik pissarsisassapput. Soorlu ukiumut aningaasartuutit procentinngorlugit



qanoq annertutiginersut paasissavaat. Tamanna pitsaasuvoq, tassami innuttaasut pitsaanerusemik aalajangiisinnaanissaat qulakkeerneqarpoq.

Naleqqamiit aamma pitsaasutut isigaarput, atuisut ulluni 14-ini peqqissimisinnaatitaalernerat. Ilaannikkut inuit sukkasuumik isumaqatigiissusiorsinnaapput, kingusinnerusukkullu aatsaat paasilerlugu isumaqatigiissut iluanaarutaasumik inissisimangitsoq. Taamaattumik eqqarsaatigeqqissaarsimallugu tunuarnissamut periarfissaq innuttaasunut pingaaruteqarluinnarpoq.

Aamma pitsaasuvoq, inuussutissarsiutilik akiligassiinialersoq siumut naliliisassammat atuisoq akiligassissallugu tatiginarnersoq. Tamanna pingaaruteqarpoq, ingammik inuit aningaasatigut ajornartorsiuteqalersinnaasut eqqarsaatigalugit. Inatsit pitsaasoq tassaavoq innuttaasunut illersuisoq, taamatullu aamma inuussutissarsiortut akisussaassusilimmik ingerlatsinissaat qulakkeertarlugu.

Naleqqamiit aamma paasilluarparput siunnersuutip siunertaa tassaasoq ajornartorsiutaalersinnaasunik sioqqutsilluni pinaveersaartitsinissaq. Tamanna pingaaruteqarpoq. Inatsisip atuuffia annertusarneqassaaq, taamaasillunilu atuisut akiligassarsinerinut aammalu atortariaqakkanut taarsigassarsinernut amerlanerusunut atuutilersinnaalluni.

Aamma Naalakkersuisut immikkut taasaqarput siunissami SMS-ikkut taarsigassarsisitsinnaanerat assigisaallu sioqqullugit sillimaffigineqarsinnaalissasut. Tamanna aamma eqqortutut isigaarput.

Soorunami inatsisiliorneq sukumiisumik suliarineqassaaq. Uanilu isumarput tassaavoq, innuttaasut pitsaanerusemik illersorneqarnissaat, isumaqatigiissutit ersarinnerunissaat aammalu aningaasaqarnikkut akisunerusinnaasut pillugit pitsaanerusemik malittarisassaqaarnissaq pisariaqartoq. Taamaattumik siunnersuut manna taperserparput.

Naleqqamiit pingaartipparput, inatsisit innuttaasunut iluaqutaasariaqartut. Inatsisit paasiuminartuusariaqarput, naapertuuttuusariaqarput, illersuinissaallu qulakkeertariaqarlugu. Uani siunnersuut tamakku amerlanertigut naammassiniarsarai, taamaattumillu pitsaasutut isigaarput.

Naggasiullugu oqaatigissavara, inatsisitoqqap ullutsinnut naleqqussarneqarnialernera pitsaasuusoq. Innuttaasut illersorneqarnerat pitsaanerulersinneqartoq Naleqqamiit



nuannaarutingaarput. Aammalu aningaasaqarnikkut isumaqatigiissutit pillugit
ersarinnerusunik malittarisassaqaqalerneq pitsaasuvoq.

Tamanna tunngavigalugu Naleqqamiit siunnersuut taperserparput Inatsisinullu
ataatsimiititaliamut ingerlateqqinneqarnissaa innersuupparput.

Qujanaq.